

欽定剿平三省邪匪方略

欽定剿平三省邪匪方略正編卷一百十一

己未年

七月二十日

丙子

松筠奏言查張漢潮股匪逼近

棧道經慶成永保帶兵分路迎擊賊匪不能西

竄遂出黑水峪沿山東奔叅將海洪阿自斜峪

關趕到截殺慶成永保追躡甚緊賊匪遂由子

午峪入山向五郎廳境內奔竄現在明亮抵商

州由東截剿慶成永保由西面夾擊至平利境

內賊匪三股其竄至鎮平者在平利縣城之東
道員溫承惠恐其由秋山溝一帶乘隙北竄馳
赴東路佈置適山水漲發過河落水被衝救免
仍趕赴秋山溝聚集鄉勇憑險設卡賊匪不能
北竄遂南由茅壩衝破湖北西溝卡隘奔向竹
谿境內滋擾聞此股賊匪徐添德卽在其內其
一股至八廟河者賊目高蘭英聞係高均德之

妻亦由平利交界之中心石奔回川省大寧境
內惟在孟石嶺一股人數較多訊知賊目係吳
張王三掌櫃張起貴當在其內匪衆竄赴兩扇
門因乏食折回要衝破孟石嶺營卡往安康一
帶尋掠總兵慶溥分兵兩路迎擊候補把總義
首王英從金家山梁下壓殺賊一百餘名生擒
五名守備吳一鳴楊伏國千總徐士伯把總趙

盛陽皆當先搶殺受傷陣亡次日賊匪分路攻
撲官兵鄉勇營盤慶溥派遊擊朱天貴都司張
世儒等帶兵七百名趕至金家山督同鄉勇防
禦自率叅將李逢春等由大路右山包迎剿斃
賊二百餘名該匪退至左山包據險抗拒都司
額爾吉善縱馬直上身受重傷把總張述勲外
委花郎保亦受鎗傷旋俱身故朱天貴等帶兵

至金家山正值鄉勇追賊入林賊匪兩面衝出
鄉勇抵敵不住賊匪直佔山梁朱天貴迎頭力
戰連放大礮轟斃賊匪甚多時值大雨相持一
晝夜次日復來攻撲我兵奮勇爭先殺賊三百
餘名該匪紛紛竄入老林朱天貴趕入林內連
殺數賊因追執旗賊目被伏賊戕害守備徐天
佑把總王瑄趕往救護同時陣亡我兵愈加憤

恨一擁衝進又連殺數十人賊匪始退時慶薄
一路一面仰攻賊匪一面密派李逢春於五鼓
繞道抄出賊旁併力殲擊殺賊一百餘名該匪
敗走俱由原路奔向安家河霸王廟一帶我兵
兩路追殺賊匪滾崖墜溝死者不計其數此次
打仗凡三晝夜陣亡將弁十員兵勇三百餘名
殺斃賊匪千餘人賊匪不得北入平利西犯安

康實賴將士奮勇之力而叅將李逢春尤爲奮
勉所有傷亡兵勇查明咨部照例議卹所出將
弁等缺卽著慶溥於該營出力人員內秉公擬
定具報咨明勒保奏請補放其西鄉境上賊匪
在魯家壩者賊目係龍紹周又云係卞化龍匪
衆約千餘人現已南竄大草池其在黨池壩者
賊目係苟文明又云鮮大川亦在其內又稱于

司舉係苟文明小頭目匪徒數千分股至龍池
場經王文雄分撥兵勇在倒水洞埋伏突出截
殺數十人賊匪卽折回原路林木稠密未便追
剿該匪現在菩提河屯紮其在混人坪者未知
賊目姓名現已竄回入廟河荒田嘴五塊石王
黑壩等處其阮添元卽冉添元又從魯家壩分
出竄至塔壩河匪衆約三千餘人現在西鄉賊

匪共有五股在東西南三面或分或合往來滋擾王文雄分兵堵禦尙屬得力昨奉

諭旨道員溫承惠僅帶鄉勇令臣酌撥兵丁前往協

剿臣通籌各路情形西鄉邊界延長七百餘里

賊股繁多王文雄有兵三千餘名新舊鄉勇二千餘名往來堵禦未令深入平利之賊兩股雖已竄出陝境而現在安家河一股人數較多慶

溥所帶兵二千餘名併溫承惠之鄉勇二千餘
名僅能分防隘口不敷剿捕之用似應酌量添
兵惟是各路軍營均關緊要不能抽撥而陝甘
營分再無可調之兵若於遠省征調行走有需
時日亦屬緩不濟急臣何敢冒昧奏請查王文
雄慶溥柯藩溫承惠等數日以來奔走堵禦雖
未能驅除賊匪而終不能深入陝境窺伺漢江

是剿雖不足堵尙可恃臣已飛飭各於要隘處

所多設滾木撞石加意防守以堵爲剿切勿遠

出追擊致賊乘間闖入總期將張漢潮一股及

早剿除騰出兵力其平利西鄉界上之賊卽可

以次削平再藍號餘匪竄入南江昨復折回陝

境恒瑞甫抵漢中得信卽帶兵渡江赴南路截

殺連日在法慈院蓬壩青石關等處打仗三次

殺賊約數百名該匪捨命狂奔恒瑞因追賊緊急未及敘摺具奏

松筠又奏言查富成原帶四川河南鄉勇經

臣

將鹽糧全行找支散給衣履曉諭約束鄉勇無不感激悅服願往西鄉出力嗣經王文雄汰去老弱二百名送還漢中其情願回籍者一百五十一名均已詢明住址按其遠近里數每名每

站給予盤費制錢六十文分爲兩起每起擇其老成者諭令管束填給路票札知沿途地方官照料並取原籍州縣收管回文行走安靜不至去而從賊亦不至遇賊戕害其不願回籍者四十餘人或在漢中貿易或隨各軍營充夫均交地方官及隨營糧員稽查其留營之一千八百名人皆精壯王文雄頗能駕馭另派安弁嚴爲

管束

臣

仍留心查察俟兵力稍充足敷防堵卽

當漸次裁撤至各路軍需現於寶雞鎮安商州
五郎有城池處各設總糧臺分派幹員管理預
貯銀糧就近供支運送不致匱乏所有甘肅被

賊蹂躪地方

臣

經遵

旨據實查明開單具奏奏入

上命軍機大臣傳諭松筠曰此次慶溥李逢春等打

伏三晝夜共殺賊千餘人使不得北入平利西犯
安康賊衆兵單將士用命慶溥實屬可嘉而李逢
春尤爲奮勇出力所辦甚好朱天貴追賊入老林
連殺數賊遇伏被戕甚爲可惜著咨部加等賜卹
其餘打仗陣亡之都司額爾吉善守備吳一鳴楊
伏國徐天佑千總徐士伯把總王瑄趙盛陽張述
勲外委花郎保均屬可憐俱著咨部賜卹道員溫

承惠恐賊匪北竄馳赴東路佈置遇山水漲發被衝救免尙無妨否並著松筠遇便覆奏至所稱王文雄等兵力稍單陝甘營分現無可調之兵已將富成原帶之鄉勇一千八百名交王文雄帶領在西鄉堵禦松筠惟當飭令王文雄等加意防守以堵爲剿總俟張漢潮一股及早撲滅騰出勝兵以次削平各股賊匪又據稱藍號賊匪折回陝境恒

瑞卽馳赴南路截剿殺賊約數百名是恒瑞能酌量緩急因有明亮等夾擊張漢潮伊卽追剿藍號所見甚是至各路軍需就近分派幹員料理尙屬妥善不似勒保惟以賣請軍餉爲務也

同日

上諭內閣曰前因甘省被賊滋擾降旨諭令該督等將應行蠲緩各州縣錢糧通行查奏茲據松筠查

明開單具奏所有甘省被賊蹂躪之鞏昌府屬隴
西寧遠伏羌通渭岷州西河漳縣秦州並所屬秦
安徽縣兩當禮縣三岔州判階州並所屬成縣西
固州同等一十六州縣州同州判本年應徵地丁
正耗並雜賦共未完銀九萬一千五百九十五兩
零正耗倉斗糧三萬二千七百八十四石零草六
百束民借籽種口糧京斗糧六千四百二十八石

零又未完乾隆六十年並嘉慶元二三等年帶徵
舊欠地丁正耗銀二萬八千五百八十一兩零正
耗倉斗糧七千六百二十二石零未完嘉慶元二
三等年民借籽種口糧折色銀三萬三千三百五
十六兩零本色京斗糧九萬一千七百一十四石
零俱著加恩全行豁免其隣近賊氛路當孔道之
蘭州府屬臯蘭金縣狄道渭源循化河州靖遠沙

卷之三
泥州判紅水縣丞鞏昌府屬洮州安定會寧平涼
府屬鹽茶平涼固原靜寧華亭隆德莊浪縣丞甘
州府屬撫彝張掖山丹東樂縣丞涼州府屬武威
永昌鎮番古浪平番寧夏府屬寧夏朔靈州中
衛平羅秦州屬之清水階州屬之文縣涇州並所
屬靈臺崇信肅州並所屬之高臺安西州並所屬
玉門等四十二廳州縣州判縣丞本年應征地丁

正耗並雜賦共未完銀一十四萬六千九百五十
六兩零正耗倉斗糧四十八萬七千二百四十七
石零草三百六十四萬七千四百六十四束馬廠
地租銀三千三百一十五兩零民借籽種口糧京
斗糧三萬九千二百八十五石零未完乾隆六十
年並嘉慶元二三等年帶徵地丁正耗銀一十萬
五千一百五十四兩零正耗倉斗糧三十萬五千

三百五十二石零草三百一十萬九百九十三束
馬廠地租銀八千三百四十兩零民借未完籽種
口糧折色銀六十七萬二千三百八十一兩零本
色京斗糧一百一十二萬八千七百五十一石零
亦俱著加恩寬免十分之三以副朕加惠閭閻至
意

同日松筠又奏言

臣前奉

諭旨令臣覆訊叅革總兵官信一案現經馬慧裕派

員將官信解送到案臣親加研鞫據官信供我

帶山西兵一千九百八十二名先係副都統永

德管領後因承德病故我自上年十月奉委接

管於大池壩堵禦川匪嗣奉調追剿張漢潮賊

匪從城固洋縣商州一帶追至河南盧氏地方

賊匪折回我復趕回實是隨賊奔跑以致兵丁

疲乏多有落後我心中著急不敢停留等待嗣
趕得愈急落後兵丁愈多我雖在松樹溝及二
郎壩打仗兩次實在殺賊無多賊匪自甘省折
回欲由棧道翻山竄赴洋縣一路我想從後尾
追恐趕不及卽能趕上我兵少亦屬無濟若由
漢中城固大道行走里數較近可以繞出賊前
順道謁見恒將軍意欲求兵數百名帶領起到

洋縣截剿因挑帶精壯兵丁二百餘名兼程行走來見恒將軍並不緊追賊匪理應叅革問罪至我身爲總兵不善約束兵丁落後多名又因糧餉間或一時不及趕到並不能設法辦理以致兵丁沿途買食或自赴州縣領取落後者日漸加增都是我無能實在辜負

皇上天恩只求將我從重治罪等情

臣

查官信身任

總兵一任賊匪由陝竄豫又竄至甘肅陝西總
未能鼓勵官兵設法剿辦僅事尾追名雖打仗
實隨賊奔跑自疲兵力且帶兵剿賊必須紀律
嚴明兵丁落後卽應按軍法嚴治以儆其餘乃
一味柔懦姑息聽其自由以致落後者愈多是
其原帶之兵尙不能安爲管領反欲向恒瑞求
兵繞至賊前截剿殊非情理其糊塗無能貽誤

軍機之罪實無可追查律載凡貽誤軍機者斬
監候官信應依律擬斬監候以爲貽誤戎行者
戒至落後兵丁沿途買食雖無搶掠情事實屬
不守紀律但數日之後旋卽收齊現經永保帶
領打仗應請邀

恩毋庸置議並將官信暫於漢中監禁恭候

諭旨奏入得

旨官信依擬應斬著監候卽在陝西省城收禁不必
解京

同日廣厚奏言查去夏賊匪李全今春賊匪張
漢潮楊開甲張金魁張士龍張士虎等先後由
兩當之楊家店秦州之利橋階州之梅子園闌
入甘境秦階一帶已爲賊匪熟由之徑目下四
川各逆尙未全數蕩平各路官兵正在悉力剿

辦賊匪亡命奔逃難保其不又乘虛西竄且張
漢潮一股近在陝省滋擾該匪狡猾異常奔突
靡定尤須嚴爲防範杜其窺伺之心惟甘省邊
界與川陝毗連者自清水至文縣東西綿亘幾
二千里山徑叢雜處處有路可通斷難一律撥
兵防守自應相度扼要適中之地嚴密堵禦
臣
等再四籌酌吉蘭泰前赴兩當之太渠索費英

阿前赴楊家店又派委遊擊伊星阿都司馬良

棟駐紮徽縣虞關

臣

卽前赴秦州屏蔽寶雞隘

口並與吉蘭泰等各路互相策應至階州梅子

園一帶雖亦關緊要但嘉陵江現當水勢盛漲

之時江面寬濶不能洄渡足資保障俟九十月

間江水減落再行查看情形分派兵丁前往防

堵又甘省各營兵丁節次調赴川陝剿捕已不

下二萬餘名存營無幾臣所帶之兵俱係召募

新添乘此空閒之際飭令逐日操演務俾技藝

純熟並可遙壯聲威使賊匪聞風震懾再臣傳

齊撒拉爾回兵宣布

恩旨該回兵伏地叩頭同聲感頌並據稱我等蒙

皇上厚恩極欲前赴川陝幫同剿賊但我等世居循

化河州地方本耐寒冷川陝天氣炎熱水土素

不習慣到彼多染疾病若打仗不能得力轉恐
辜負

天恩情願在省隨同官兵堵剿出力臣察其所稱俱

屬實情查該回兵勇驚性成向來爲賊匪畏懼

以之堵剿皆屬有益且張漢潮一股昨被陝省

各路官兵剿捕情急奔赴寶雞之東河橋與秦

州連界已有入甘之勢嗣臣帶兵赴秦旋即折

回東窺必須嚴爲防範隨遵

旨飭令該回兵暫在邊界駐劄以資堵禦俟賊匪離
甘已遠再令回巢又前奉

諭旨令臣酌調寧夏滿兵防堵查寧夏屬在甘省北

界幅員遼濶不可無兵彈壓其寧夏綠營官兵

調赴軍營者已多現在止存滿營兵丁應請毋

庸調撥以重地方再州同借補州判縱司燭隨

臣剿辦賊匪最爲勇往出力經臣保奏

賞戴藍翎遇有知州缺出卽行奏補查該員前署河

州於撒拉爾回情甚爲熟悉深得其心此次撒

拉爾回兵到營後臣派令該員管束駕馭不但

打仗出力且恪遵軍紀極爲安靜現在遵

旨留該回兵等仍隨臣在邊界防守尤須妥爲彈壓

可否仰懇

皇上逾格鴻慈將縱司燭准其先換陞銜頂戴並賞
換花翎以資銓束之處出自

天恩奏入

上命軍機大臣傳諭廣厚曰甘省秦階一帶舊爲賊
匪熟識之徑目下四川各股賊匪旣難保其不乘
虛西竄而張漢潮一股近在陝省滋擾又恐折竄
入甘邊境自應嚴爲防禦廣厚與吉蘭泰籌酌於

甘境與川陝毗連之地相度要隘處所分兵駐守
又派索費英阿伊星阿馬良棟各駐要地以便互
相策應籌辦皆甚妥協廣厚乘此空閒之際將所
帶新兵逐日操演務令技藝純熟遒壯聲威深得
備豫不虞之意所辦亦好撒拉爾回兵因不耐暑
熱不欲前赴川陝自不必強令前往現據廣厚奏
留在彼堵禦足資得力但張漢潮經陝省各路官

兵剿辦勢已窮蹙若賊氛已遠甘境實可寧謐卽
可令該回兵各回本處不必久留坐糜廩給總在
廣厚酌量情形妥爲辦理州同縱司燭隨同廣厚
剿賊勇往兼能彈壓回兵著照所請准其賞給知
州陞銜頂戴並賞換花翎以示鼓勵

二十五日

辛巳

上諭內閣曰自教匪滋事以來三載有餘輾轉奔逃

沿及川陝楚豫等省迄今尙未蕝事或因官兵祇知剿捕未曾出示招撫賊匪等自知罪大不敢解散投誠又以各處村莊散漫不能堅守賊匪遂得肆其擄掠而帶兵各員向無經畧爲之統轄彼此遷延事權不能盡一賊匪日久未平未必不由於此朕於正月親政之後卽下詔明白宣示宥其脅從並爲賊中投出者謀及身家之計是剿撫兼施

之策已行又令川陝楚豫各督撫諭令各村民守
堡結寨創挖溝濠悉力保護是堅壁清野之策已
行特授勒保爲經畧大臣居中調度節制各路以
重事權與前此之漫無統率者迥不相同乃數月
於茲投出之人甚覺寥寥而各路帶兵大員亦皆
惟事尾追未曾殲淨一股賊匪實不可解難民等
猝遭兇暴莫免須臾之死不得已受其束縛豈肯

甘心從賊始終不渝卽此日賊匪黨與亦無非從
前被誘村民天良具在目覩朝廷寬大之詔自必
卽思改悔脫身賊中何以經此番膽黃宣示之後
賊黨仍固結如前朕宵旰焦思反復推求其故必
因連年地方官朘削脂膏激成事變小民等困於
誅求遂爲賊所誘脅今見貪墨之員尙未盡黜恐
投歸後仍遭侵虐不能各遂其生且當室廬焚燬

蕩析離居之時無良吏爲之撫綏仍難安業是以
觀望逡巡未敢卽行投出著松筠魁倫倭什布吳
熊光高杞永保卽行查明所屬州縣有如戴如煌
之貧縱虐民者不妨嚴叅數人以洩公憤如一時
乏員補用卽由京揀選發往其素得民心之員如
劉清諸以謙方積林嵐等卽行奏請陞擢用示風
勵庶被脅之人聞知會墨屏退吏盡循良自必幡

然來歸紛紛就撫如有自賊中投出者不但脅從
閭閻卽爲首者亦當施浩蕩之恩概予赦宥卽如
從前湖南苗匪吳隴登原與石三保吳半生等一
同滋事投誠後免其一死仍賞給五品頂戴約束
苗民數年來甚屬安靜今教匪之罪與苗匪相等
但能及早歸誠吳隴登前事具在朕必特加寬宥
如此剴切曉諭俾賊匪知叛則必誅降則必赦予

以自新之路釋其死守之心未必非解散賊黨之
一法各該督撫其通行曉諭知之

臣
等謹案我

皇上克寬克仁痼瘕在抱自

親政以來

溫綸疊降不特良民之罹鋒鋷被蹂躪者撫卹惟恐
或遺卽脅從悔罪之徒仰蒙

鑒其蚩愚或出於偷生情急

許以自新籌其生計此而不知感動及早投誠實屬

自外

生成無可原貸迺荷

如天浩蕩猶以椎魯之民或見墨吏未盡褫黜心存

觀望

特令封疆大吏查叅劣員遴保廉吏其賊中首惡果

能革面投誠者亦概從寬宥

善政善教法外

施仁豈特下車祝網之比哉

二十六日

壬午

恒瑞奏言竊

臣

行抵漢中將兵丁

衣履趕緊製辦正在起身時忽據探報藍號賊

匪復由廣元折回陝境竄至南鄭之黃官嶺紅

廟塘一帶直向東奔查此股餘匪既不能趕上

白號必思乘間渡過漢江北岸與張漢潮會合

臣

自應就近先剿此股隨即帶兵渡過漢江南

岸一面飛飭王文雄在鍾家溝羅家壩等處嚴

密堵截並派副將九十等帶兵六百名由銅廠

一路緊躡追剿

臣

率領總兵擬德副將德忠等

帶馬步官兵分路向牟家壩兩河口一帶截殺

該匪連夜狂奔已過牟家壩向東逃竄

臣

隨即

追至法慈院趕上賊尾極力掩殺斃賊二百餘名餘匪竄至五郎壩因王文雄帶兵在羅家壩

山梁堵截未能再向東竄

臣

恐其乘間偷渡漢

江卽由松樹菴司渡河一帶向南兜截副將九

十等從西面追躡賊知東西北三面皆有官兵

遂向西南一路奔逃九十等趕至彭壩殺賊六

千餘名

臣

繞至青石關截殺又斃賊一百餘名

連次擒獲小頭目王世德等四十七名除被裹
民人馬祿等十九名交隨營糧員查明給與路
票釋放外其餘真賊卽行正法連日打仗防禦
郭新布鳳安前鋒忠興身受矛傷兵丁內間有
傷亡俟查明咨部臣因趕緊追賊凡遇溪河俱
係淌渡前鋒察爾經阿把總海滿蛟兵丁馬化
成等九名行入深溜均被衝斃應請照陣亡例

一併咨部賜卹至官兵行走緊急天氣躁熱間

有中暑者

臣卽將

御賜藥丸隨時散給調服俱已平復查藍號賊匪又

經節次剿殺更屬窮蹙

臣

前派總兵觀祥由大

安阜川一帶向南兜截賊匪遂逃向鐵嶺關東

南大山紛紛入老林奔竄

臣

現在派兵分路截

擊如能日內殲除淨盡固屬甚善或有零星餘

匪竄回川境川北之兵足敷剿辦

臣仍遵

旨趕緊馳回漢江北岸相機剿辦張漢潮逆匪務期
迅速肅事奏入

上命軍機大臣傳諭恒瑞曰藍號賊匪前經恒瑞逼
至川北後恒瑞卽回漢中會剿張漢潮一股祇因
勒保調度無方並未先行派兵截擊以致藍號賊
匪於川北空間地方乘隙屯紮無兵剿捕得暇由

廣元折回陝界竄至南鄭一帶直向東奔恒瑞恐
該匪等渡過漢江北岸與張漢潮合夥卽帶兵就
近追剿所辦甚是現在賊匪已向鐵鎖關逃入東
南大山老林奔竄正可併力合擊乘勢殲除恒瑞
追剿此股賊匪半載有餘現已得手此次帶兵兜
截凡遇溪河卽時淌渡甚爲出力莫若乘其窮竄
奮力追擊先將此股速行剿盡如有零星餘匪竄

回川北者恒瑞雖係西安將軍亦不必心存畛域不妨追躡二三百里之外將賊夥悉數掃除以膺懋賞現在張漢潮一股有明亮慶成永保三人分投佈置相爲犄角足資剿辦恒瑞此時且不必馳回漢江北岸竟當將藍號賊匪掃蕩再移兵前赴明亮等一路會合夾擊更可得力所有此次淌渡衝斃之前鋒察爾經阿等俱著咨部照陣亡例賜

卹

二十七日

癸未

明亮奏言竊

臣

前奏馳赴商州追

剿賊匪初十日行抵藍田探報小股賊匪一百

餘名離藍田甚近

臣

統兵迎進該匪卽由帶峪

翻山入老林向南奔竄尙有一二百餘匪在商

州屬之秦嶺鋪牧護關等處忽分忽合往來游

奕離豫甚近飛卽督兵兼程進發途次接據長

春墨臣保稟報該鎮等於涼水溝一帶遇小股
賊匪兩次打仗殲擒二十餘名奪獲器械甚多
並散出被擄難民百餘名均各妥爲安插餘匪
猶在商州東南奔逸十一口

臣

抵牧護關長春

在該處紮營適商州牧陳祁帶領鄉勇到來當
將現有兵勇分設商州以西泥峪口黑龍口秦
嶺鋪牧護關等處均係入豫緊要路口一面偵

探張漢潮大股賊衆若相隔較遠正可趁此先
將小股賊匪剿淨以免牽綴十二日趕赴商州
擒獲賊探高升等二名訊供張漢潮在松樹嘴
住紮聽信欲來商州找尋小股合夥同往河南
奔逃等語當將該犯等梟示臣卽令愛星阿長
春帶領索倫山東官兵往軍嶺山堵剿臣與興
肇三鼓發兵馳抵三十里鋪復據前探兵勇報

稱張逆聞有官兵攔截已由松樹嘴峒峪河等處向南往山陽前竄卽督兵趕至上關坊賊已至苦竹園出下關坊遁走入山陽之東溝屯紮次日由高壩店澇峪口等處狂奔臣一面飛飭

愛星阿長春帶兵趕赴協剿臣等晝夜兼程趕

至商南縣探知張漢潮已由中村銀花前竄竹林關查該處北通普峪河仍可逃往豫省南通

鄭西東通鄭陽均相隔二百餘里臣趕至普峪

河查看賊人搶渡之處水深丈餘人馬俱不能

渡間有淺處皆係淤沙陷泥卽賊匪亦不能偷

渡臣沿河趕至青山見南陽鎮巨田永桐在彼

堵禦據稱張文奇在雞頭關截剿叅將蔡鼎在

富水關堵禦守備楊如棠駐紮荆紫關都司蘇

大維駐紮牌樓溝是豫省邊界經吳熊光擇要

酌派官兵堵截已屬嚴密自商州至龍駒寨通
豫要路又經陳祁派有鄉勇堵禦豫省可保無

虞

臣

聞鄖西鄉勇素稱驍健齊心努力賊匪若

往鄖西卽趕上兩面夾擊該匪若向鄖陽彼處

雖兵守空虛

臣

現已馳過荆紫關在陝豫楚三

省交界之白浪地方離鄖陽府鄖西均不過一

百八十里探知確信帶領馬隊一晝夜卽可趕

到若該逆聞風仍折回商南山陽一帶恒瑞慶
成永保等統領大兵相繼而至四面圍圍可期
一鼓擒渠奏入

上命軍機大臣傳諭明亮曰此次張漢潮一股由松
樹嘴等處竄至竹林關與豫楚兩省交界相隔均
二百餘里明亮雖已馳過荊紫關在白浪地方相
機截剿仍未能痛殲賊衆於擒渠歲事之期尙無

把握而摺內兩面夾擊四面圍圍一鼓擒渠等語
不過空談敷衍總無實效閱之生厭試使清夜捫
心能無愧作乎此時明亮等既在陝楚三省交界
屯紮離鄖陽鄖西較近賊匪若竄至鄖陽一帶卽
可迎頭截殺如直趨商維一帶逼近豫省明亮尤
當繞前奮擊倘賊匪知兩路均有官兵截住仍折
向南山等處則有慶成永保自西而來正可趁勢

迎剿其時此股賊匪可專交伊二人剿辦明亮與
興肇卽帶兵就近取道鄆西速赴竹山竹谿幫同
倭什布速剿李淑徐添德宋慶子等股倭什布處
賊衆兵單待援甚亟興肇本係荊州將軍與明亮
同莅更可得力前添調山西官兵諒可陸續趕到
明亮卽可全行帶領赴楚總之張逆一股明亮斷
不可令其入楚與李淑等合夥亦不可令其闖入

豫境必須察看賊勢實離楚豫邊界甚遠折回西
南慶成永保可以接辦明亮等方可帶兵入楚或
現在明亮等剿賊已得勝勢正在喫緊之際又不
可於功屆垂成舍之他往莫若殲盡此股肅清一
路然後鼓行而前迅掃楚氛更爲妥善

上又命軍機大臣傳諭慶成永保曰明亮等奏張漢
潮一股竄至竹林關明亮等已馳赴白浪地方預

備迎截而摺內稱慶成永保等統領大兵相繼而
至並未提及現在何處可見慶成永保在後跟追
離賊較遠是以明亮未得伊二人夾擊之力慶成
永保自漢中向東追剿卽不能繞前迎截亦當緊
躡賊蹤乃總未趕上賊匪仍蹈從前尾隨惡習殊
屬因循玩愒慶成永保著傳旨申飭現在明亮等
在白浪屯紮若賊匪向東北奔竄經明亮等截擊

自必仍折回西南已降旨令明亮興肇帶兵赴楚
幫同倭什布剿辦李淑等股至張漢潮一股著專
交慶成永保辦理務當趁賊匪折回窮蹙之時併
力殲擒不得又以翻山竄入老林爲詞任其滋蔓
尤不可令賊匪闖入楚豫邊界爲要

同日倭什布奏言李淑等股現由羊义河竄至
仙家坪一帶據險屯住其前在竹山境內之後

股賊匪亦由李淑等所經原路竄至蒙果寺因
知東面一帶官兵防守甚嚴卽翻越大山折向
南面與李淑等會合臣查仙家坪一帶尙在房
縣西南山重路歧賊匪敢於據險相持者其意
總因川省重兵雲集地面荒涼無可掠食必欲
東入下游以爲苟延殘喘之計臣所帶兵勇無
多勢難處處過絕而紮營之黃龍堰最爲扼要

之地尙可四路兼顧連日以來節次派撥官兵
由上達河獅子巖等處相機進剿賊匪憑高堅
守或於深溝密箐之中設伏抗拒嗣於十三四
五等日賊忽分爲數股或由化峪河陳家鋪等
處向北奔竄或從石林溝軍馬鋪等處直趨而
東臣一得探報卽飛派兵勇抄前埋伏用鎗礮
擊回不致分投肆竄十六日賊匪繞出陰峪河

突至熊家包放火滋擾

臣

因該處距房縣城僅

十餘里恐賊情詭詐意欲窺伺縣城故於熊家

包分股屯聚希圖截斷我兵救援之路

臣

當派

遊擊全祿都司胥泗起等酌帶兵勇馳赴熊家

包截剿一面密派副將孫清元都司鄧興相等

帶領兵勇由東面無賊處所繞往縣城防護是

晚初更時各兵勇行抵房縣西關外正遇賊匪

由東西兩面蜂擁而來攻撲縣城該縣知縣金克俊典史蔣大錫會同把總楊占魁督率在城兵勇竭力抵禦正在危急之際我兵猝然趕到鎗礮齊發賊匪不及防備當卽潰亂被我兵擊斃一百餘人餘匪卽由彭峪河鐵廠等處向銀杏坪竄去官兵儘力窮追沿途斬馘三十餘人生擒唐士鳳等十三名因大隊賊匪前來接應

兵勇始行轉回當提唐士鳳等訊據供稱仙家
坪等處居民多將糧食搬進城內無可掠食所
以李淑遣令攻城圍搶米糧李淑係襄陽人總
欲由保康南漳竄往襄陽等語當各正法其熊
家包屯聚之賊經官兵截剿仍由盤峪河退歸
賊巢臣查賊匪衆多立意東竄臣所帶兵勇祇
三千餘名現在房城緊要業留孫清元鄧興相

等帶領兵勇八百餘名暫住城外相機截擊以

免疎虞

臣

現有兵勇二千餘名實不敷分投堵

剿仰蒙

聖恩飭令川省原剿官兵赴楚幫剿並派山西官兵

三千名前來協助約計到營尙需時日賊匪股

數既多又復飄忽無定是以

臣

酌量緩急先於

鄖西漫川關防兵內均調五百名令鄧興相帶

領仍令道員恒慶再僱得力健勇五百名協守

漫川卡隘以抵調缺兵數

臣

惟有督率現有官

兵察看賊勢相機截剿斷不敢坐候川晉各兵

致悞機宜至川省大寧各股賊匪現經勒保派

令重兵由東西兩面夾擊賊匪必向北旁竄查

楚北之房縣竹山竹谿三屬均南界大寧此內

房縣一屬有險可扼尙屬無妨而二竹一帶山

勢較平各卡所設兵勇本止數百名且相距數
十里至百餘里不等倉猝難以應援刻下羅牛
年一股尙在竹谿西南之蕭家坡香溪一帶盤
折無定而界外徐家壩等處又有賊匪多股往
來奔突不能知其名姓此時平利賊匪業向兩
扇門奔竄距境較遠臣隨飛飭總兵路超吉將
西面竹葉湖等處兵勇酌量抽調並該鎮原帶

兵勇約計可得二千餘名仍令再僱健勇一千
名督同叅將海麟都司歐國充將羅半年一股
逼逐出境卽於南面各要隘分佈駐守寔力堵
禦一面飛飭總兵王凱督率巴東邊卡將弁一
體加意嚴防以免再有竄越至竹谿竹山房縣
保康等縣城守空虛此時賊氛亂竄臣已飛飭
該縣等各僱健勇數百名防護城池其餘四鄉

仍令激勸義勇設卡守禦自保村莊以節糜費
臣復欽遵

諭旨將脅從罔治之意用黃布書寫簡明告示於賊
匪奔竄處所遍行曉諭日來被裹逃出者其有
一百餘人訊悉被裹良民間知

聖德如天皆欲乘間散出無如賊匪看守甚嚴一經
知覺卽被殺害是以不敢輕動等語當各給與

路費資送回籍一面仍設法招撫以冀黨夥日漸解散奏入

上命軍機大臣傳諭倭什布曰此次李淑等股賊匪分竄石林溝等處倭什布恐其攻撲房縣城池先派將弁到彼防護接應擊退賊匪以少勝衆所辦可嘉至抽撥漫川關防兵到營及令路超吉等先將羅半年一股逼逐出境並飭王凱於巴東邊卡

加意嚴防各事宜所見俱是鄖陽鄖西一帶賊衆
兵單倭什布能策勵將士分頭抄擊立解圍城尙
爲竭盡心力本日已降旨令明亮與肇將所調山
西兵全行帶赴楚省幫同該督剿辦并欲令額勒
登保前往協助倭什布務當持以鎮定不可乘明
亮等未到之先亟思立功致有輕進冒險之事祇
須扼要堵剿固守城池勿令賊匪再往東竄卽爲

盡賊倘賊匪見官兵防禦甚嚴仍折回川境倭什布亦不可越境追趕總以嚴守本境爲要

上又命軍機大臣傳諭魁倫曰據明亮奏張漢潮一股賊匪竄至竹林關係楚豫交界地方明亮察探賊蹤或向鄖西或折回山陽商州卽帶兵剿殺等語現在明亮駐兵處所距鄖西止一百八十里赴竹山竹谿甚近未便又令繞赴達州轉致紆遠已

降旨令明亮卽由彼赴竹山竹谿剿賊著魁倫探
聽如明亮追剿張漢潮一股或又至山陽商州一
帶魁倫自當親資前諭就近面交明亮閱讀明亮
當遵續降諭旨帶兵赴楚魁倫卽馳赴達州審辦
勒保並接辦川省剿賊事宜如探得明亮仍在郾
西一帶魁倫卽不必赴明亮軍營著將前奉諭旨
及此旨一併抄寄明亮閱看魁倫卽取道徑赴達

州傳旨拏問勒保接受督篆將勒保嚴行審訊定
擬具奏不必會同明亮審辦一面將經畧印信派
安幹大員賁送明亮軍營朕思額勒登保現在剿
辦王登廷等股賊匪計日當可竣事應酌帶兵勇
前赴楚省協剿莫若將經畧印信卽交額勒登保
賁送明亮接受沿途所帶之兵足資防護更爲安
協本口又據倭什布奏兜截李淑等股賊匪立解

房縣城圍其所帶兵勇僅止三千餘名等語倭什
布一路自李淑徐添德等闖入竹山竹谿地界於
七月初四日遞到奏報距今二十餘日已將堵剿
情形奏過四次而勒保至今並無一字奏及惟前
據奏大寧奉節之賊向巫山東竄欲圖闖入楚疆
節據七十五稟懇派令總兵德英額副將呂朝龍
在彼防堵又添派廣東兵九百名在彼協防而於

竹山竹谿賊匪肆擾竟全未聞知現據倭什布奏
到之摺並未見川省有兵策應是勒保止知有川
不知有楚卽伊前次所派廣東兵在大寧協防亦
僅爲川省起見且徐添德等股賊匪本係川省竄
賊闖入楚境並非楚省新起之賊可比勒保之意
豈以賊匪驅出川境卽與伊無涉直欲置身事外
有如此之經畧乎前此倭什布摺內屢有飛咨勒

保之語本日奏到摺內未經提及亦明知勒保處
毫無接應卽屢次飛咨亦屬無益其所稱不敢坐
候川兵致誤機宜亦深怪勒保坐視不救特未顯
然劾奏耳勒保種種玩悞魁倫到彼卽將以上情
節及前次諭旨內指出各條向其嚴加訊問至七
十五德英額呂朝龍在大寧一帶防堵賊匪卽不
能將徐添德攔截何以賊匪由彼處擾及楚境亦

未帶兵追剿看來竟係伊三人朦混勒保並不將
賊情稟報或轉捏稱邊境寧謐賊匪藏匿老林等
語而勒保輕信其言又未能別加採訪直同聾瞶
此三人尤屬可惡並著魁倫嚴查密訪如得有伊
等縱賊確據卽將七十五等一併嚴叅治罪

同日吳熊光奏言查陝省賊匪張漢潮張映祥
二股前有折回東竄意欲由豫逃回襄陽原籍

之信彼時

臣

以該逆形蹤飄忽若明亮未抵商

州之前該逆先經竄過該州則大兵又皆落後

未免無所攔截是以盧浙一帶邊界防兵不但

不便抽赴江岸並當前赴陝省商雒境內扼要

駐守使賊匪知豫省早有準備不敢輕行窺伺

臣

一面密囑鎮臣張文奇田永桐督率官兵分

投前往欒莊黃土嶺作爲進剿之勢一面遵

旨飛傳商雒一帶以臣現帶本標兵數千及新調

盛京山西官兵五千名親赴陝境與明亮等夾剿

遙示聲威嗣因張漢潮一股於本月十四日竄

近商州明亮先於十三日趕到連夜帶兵迎擊

賊卽由商州邊境折竄山陽縣屬之竹林關等

處希冀越過商州東奔豫境南趨二鄖現經明

亮帶兵由東南一帶迎探兜截似可無虞闌入

惟是該逆狡詐異常而張映祥一股亦有東趨之勢不得不仍行嚴備是以_臣連日督同縣丞林嵐帶領開封義勇於官坡駐紮就近會同兩鎮董率將備等照舊慎密巡防斷不敢遽存大意至漢江一帶_臣前札飭南汝道陳鍾琛赴彼督同該府縣提淨南岸船筏並調集鄧州鄉勇在沿江要隘防守第思漢江道里綿長恐陳鍾

琛一人照料難周隨于本月十三日令糧道完

顏岱將臣所帶駐防滿兵三百名帶領馳赴光

化之老河口一帶上下巡防駐防兵丁均乘馬

匹於河岸往來梭織巡查至臣前請令壽春鎮

臣王集帶兵暫赴樊城一節原因彼時亟資兵

力彈壓起見今接伯麟來咨已於撫標及太原

城守各營抽撥兵丁一千名頭起五百名定於

十二日由省城起程此項官兵必由襄樊進剿
約計八月初一二日頭起可抵樊城其二起亦

可間日前進

臣

查壽春地方亦關緊要且安徽

僅有一鎮未便遠離該鎮在二道河駐紮原帶

兵一千名

臣

已恭錄

諭旨飛咨王集囑其將五百名遴派叅遊等官帶領
田間道迅往樊城仍留五百名隨同該鎮在二

道河駐劄如此辦理則晉省官兵未到之先有
壽春官兵絡繹前進襄樊一帶兵威更形壯盛
而壽春仍有大員駐劄似覺兩有裨益如壽春
官兵未到楚境賊匪李淑等已就撲滅或經官
兵截回川東並當飛咨停止至目下湖北正資
兵力剿賊況楚省爲豫省南面保障爲楚卽以
爲豫所有山西兵丁過境時如豫省無需兵力

堵剿自當催令迅速全數赴楚斷不致拘泥截
留再火器健銳兩營官兵奉

旨回京向川省陸續起程於五月初二十等日入

湖北巴東縣境先經

臣

派委委員沿途照料護

送並飭令經由各地方官預備船隻夫糧照例

應付自六月十三日起至二十八日止全數出

襄陽縣境交河南委員接護前進沿途行走甚

屬安靜奏入

上命軍機大臣傳諭吳熊光曰張漢潮股匪折向東
竄吳熊光探聞信息卽派張文奇田永桐帶兵分
赴臻莊等處扼要堵截並將添調多兵陝豫夾剿
之語傳布商雒一帶以壯聲威所見甚是其聲敘
賊匪情形與明亮所奏相符足見其偵探明確至
提過襄江南岸船筏令完顏岱帶兵幫同巡防江

岸一面飛咨山西兵丁迅速前進並酌派壽春鎮
兵五百名前來樊城其餘仍令王集留在二河道
駐劄凡所籌畫皆合機宜而摺內爲楚卽以爲豫
一語尤爲得要深爲嘉慰吳熊光惟當益加感奮
勉力堵禦巡防以期邊境敕寧其李淑李樹等是
一是二不必深問總當剿除淨盡也再完顏岱已
陞授直隸按察使現在臬司印篆有清河道贍柱

兼署吳熊光既稱完顏岱熟習江岸情形已派往
老河口布置堵禦卽著該撫諭知完顏岱留豫防
江實力巡查不必卽赴新任俟將來陝楚寧謐再
行酌量情形令赴直隸接印任事此時晉兵陸續
入豫吳熊光務飭經過地方妥爲支應